

痘疹活幼心法



影日本板

痘疹活幼心法

杏春氏手錄



痘疹活幼心法目錄

卷之上

論受病之源

折諸家之衷

闢時醫之謬

辨虛實寒熱之異

晰氣血盈虧消長之理

精炮製用藥之法

初發熱至痘出齊數日內調治法
痘出齊後起發灌濃數日內調治法
漿足回水至結痂還元數日內調治法
備用緊要諸症方論

卷之下

附或問六條

附治痘醫案十一條

附麻疹

附古今治痘要方

紙撚照法

附痘疹避忌

附幼兒雜症方論

急驚風

慢驚風

吐瀉

疳

腹痛

發熱

治痢竒方妙論

截瘧妙方

治水泄小便赤澁或全不小便者

治胎痛不安

治臨產久不下

痘疹活幼心法目錄

痘疹活幼心法卷上

清江久吾聶尚垣著

論受病之源

痘疹之源有謂兒在胎時食母血穢而致者有
謂父母慾火所致者慾火之說出於臆測固無
明據嘗見孕婦飲食清淡者生子出痘多稀少
而平順恣食厚味者生子出痘多稠密而險危
則其病源受毒于母胎血穢似有明驗蓋飲食

淡則血氣清而胎毒輕飲食厚則血氣濁而胎
毒重受毒輕故出痘少受毒重故出痘多其理
易明也近有好為奇論者謂胡人豈無慾火胎
毒而獨不出痘則此二說皆非也諸癢痛瘡瘍
皆屬心火以中國地對胡地分四方則中國屬
東南胡地屬西北東南屬火故心火旺而有痘
瘡西北屬水故心火不旺而無痘瘡又以故人
居中國則亦出痘中國人居胡地亦不出痘為

證此論似是而實非也。若痘非胎毒果因地方
火旺而有之，則閩、廣等極東南之地，其人出痘
當至再三，何以一生止一次，與中土同也？意者
胡地極寒，其人無屋居，鮮火食，冒風霜，犯冰雪，
腠理秘密，若禽獸然，卽有胎毒，當為別症，不能
宣發于皮膚，而為痘瘡。是以胡人不出痘，也不
可執此而謂痘非胎毒也。夫胎毒潛伏于五臟，
有觸則發，無觸則不發，故其發有遲速，當其未

發時形氣俱泯無可端倪若未燧之火何處尋覓又何可解釋故予以為古立預解痘毒諸方若無故而逐寇于通都不近理也及其有觸而發則勃然不可禦蓋其毒氣發自五臟實動五臟真氣全賴血氣送毒氣而出之於外運化之而成漿收結之而成痂而後臟腑可安若血氣送毒氣不出則毒氣反攻臟腑如寇作于都城中主者不能操謀奮武逐之出外致令操戈內

攻安得不危故用藥猶如用兵不可不透此理也

折諸家之衷

治痘之家多矣劉河間悉用寒涼偏害非小至於錢仲陽立方亦以解毒為主而多用寒涼少用溫補張潔古王海藏咸宗之此其意俱本於內經諸瘡瘍屬心火之一言故以寒涼瀉火也厥後陳文中立方力矯其偏專主溫補凡痘瘡

此項肺下
失一主字
補于底格
後均仿此

未出已出之間諸症悉用十一味木香散已出
之間諸症悉用十二味異功散其意歸重于太
陰一經蓋以手太陰肺皮毛足太陰脾主肌主
肉肺金惡寒脾土惡濕故用丁香官桂以治肺
之寒用木香半夏以治脾之濕二方用之得其
當其效固大然不分寒熱虛實而一概用之則
宜於虛寒不宜於實熱其偏害又可知也朱丹
溪辨之是矣至丹溪立論矯陳氏之偏而取乎

錢氏之長主於解毒和中安表似為的當舉世
宗之數百年來無敢議其失者予則以為丹溪
治他病多妙論獨於治痘則孟浪而未盡其妙
儻亦千慮之失乎蓋其矯偏于陳氏而不敢輕
用木香丁香桂附等熱劑似乎因噎而廢食懲
羹而吹鑿其取長于錢氏而必用芩連牛蒡連
翹之類以監制參耆歸朮等補劑似乎任將而
中制用兵而外監也其失亦起於泥內經瘡瘍

屬心火之言而未透其理也不知痘瘡雖屬心火卻與諸瘡不同諸瘡之毒當其初發而未成形可用藥解散內消而愈及其已形而未成膿又可用藥逐散未成膿而愈痘瘡發自五臟必藉血氣送出于皮膚運化之而成膿收結之而成痂而後收全功也可內消而愈乎可未成膿而愈乎故諸瘡以解毒為主能解毒于早則輕不能解毒于早則重痘瘡以血氣為主血氣能

送毒以灌膿結痂則生血氣不能送毒以灌膿
結痂則死解毒之藥多損血氣不顧血氣之虧
損而急於解毒是猶不慮我兵之羸弱而急於
殺敵也故毒有不必修者又有不可解者若小
兒稟賦強壯胃氣好飲食如常者其血氣自旺
自能送毒氣以成功其痘自始至終多順症此
不必解毒者也若其稟賦素弱脾胃又弱出痘
時飲食又少或瀉或渴或腹脹或手足冷或氣

短促或失聲痘或出不快或根窠不紅活或色
白而頂陷或當灌膿不灌膿或當結痂不結痂
皆由血氣不能送毒氣此不可解毒者也當速
用溫補以扶胃氣而助血氣若用參耆歸朮等
而力不及卽加入木香丁香桂附等佐之亦不
為過又何可參入苓連芩等涼品以監制溫
補之力而損血氣乎所謂丹溪未盡其妙者此
也丹溪又教人用犀角地黃湯以解痘毒後人

之字當
是一字

沿其說失其初意相習用之以為竒妙而不知
其害蓋心者血之主心之所以能主血者以其
屬火也痘瘡屬心火正藉心火以運用之身之
血而成功豈心火可瀉而去之乎蓋人身之血
溫則流行寒則凝滯犀角地黄湯涼心經而瀉
心火心經既涼心火既瀉則一身之血俱凝滯
不行何以運化痘毒而成膿結痂乎則內攻之
患作而竟以告斃者瀉心火之藥實殺之而人